



Represchentants da 26 nazions èn stads a la radunanza da delegads da l'associaziun «Isia» che reunescha scolasts da skis da 39 pajais.

FOTO G. N. STGIER

«Tgirar ils contacts tar ils amis»

Associaziun internaziunala dals scolasts da skis

DA GION NUTEGN STGIER / ANR

■ **Dapi 15 onns è Riet Campell president da l'organisaziun internaziunala «Isia» cun 150000 commembers. A Lai ha gi lieu la radunanza da delegads 2016 e quai cun represchentants da 26 nazions. Il 2016 segna Samignun per l'organisaziun dal Campiunadi mundial da skis dals scolasts da skis.** Il 1971 è vegnida fundada l'Associaziun internaziunala dals scolasts da skis «Isia». Oz appartegnan a quella scola da skis ed autras organisaziuns dal sport da naiv da 39 nazions. La sedia principala da l'associaziun, che reunescha 150 000 scolasts da skis, è a Berna. Dapi 15 onns è *Riet Campell* da Cinous-chel president da quella organisaziun mundiala. El è però er director da la federaziun «Swiss Snowsports» ed uschia il pli «aut» scolast da skis da la Svizra. En in onn vegn el a sa retrair da l'uffizi sco president da l'Associaziun internaziunala dals scolasts da skis «Isia». Terminar sia lavur sco president da quella organisaziun internaziunala cun organisar il Campiunadi mundial da skis dals scolasts da skis a Samignun saja bain ina bella finiziun. Cun Campell appartegnan trais vice-

presidents (Europa, Stadis Unids da l'America, Asia) a la suprastanza da l'organisaziun «Isia» ed anc dus assessurs che derivan da la Germania e da la Gronda Britannia. Secretari general è cun *Hugo Reider* dal Tirol dal sid in Talian.

Stads inchantads dal Grischun

La radunanza da delegads 2016 da l'associaziun «Isia» ha da curt gi lieu a Lai cun Riet Campell sco ospitant. «Jau sun satisfat dal grond interess per la radunanza da delegads cun esser vegnids en il Grischun represchentants da 26 nazions», punctuescha Campell. Ses collegas da l'entir mund sajan stads inchantads dal Grischun, dal Campiunadi svizzer dals scolasts da skis a Lai e cunzunt dal program lateral da quel event a la fin da la stagiun. «A Lai avain nus Svizzers tgirà intensiv il contact tar noss amis da l'exteriur, quai che saja ina da las incumbensas principalas da l'organisaziun», manegia Campell. Scu uniun tetgala representa l'organisaziun «Isia» ils interess e la promoziun da las scolas da skis e da lur scolasts da skis. Ultra da quai tgrira l'associaziun er il contact tranter las diversas organisaziuns dals scolasts da skis. Il ba-



President da l'organisaziun internaziunala è Riet Campell da Cinous-chel.

MAD

rat d'infurmaziuns, la collavuraziun en la tecnica ed il svilup da skis, metodica, didactica e dumondas da segirezza èn lura er incumbensas da l'associaziun «Isia». Ils commembers han er da sa tegnair a las ordinaziuns da l'uniun tetgala ed a sias leschas.